

欽定大清會典事例

欽定大清會典事例卷二百八十二

戶部

蠲恤 緩徵一

緩徵○順治八年議准。勘過被災地方。暫停徵比。以俟。

恩命。○康熙四年題准。遇災地方。督撫題報。即行令州縣停徵錢糧十分之三。○七年題准。江南省淮揚二府屬被災九分十分田地漕糧漕項。於八九兩年帶徵。○九年覆准。山東省金鄉等縣九年分漕糧。於後三年帶徵。○十一年

諭江南連年水旱。將舊欠錢糧一併停徵。並將十一年帶徵八九兩年漕項漕白銀米。悉暫停徵。○十八年題准。江南省邵宿徐蕭陽山五州縣災荒以前逋欠。分作五年帶徵。○十九年覆准。江南省賦繁積欠。追比累民。其十三年至十六年錢糧。自十九年始。分年帶徵。○二十三年。欽奉

恩詔。江南江西浙江湖廣。自康熙十三年至二十二年。拖欠漕項錢糧。著自二十三年起。每年帶徵一年。○三十年

諭。朕巡行邊外。入喜峯口。見有民間田畝為蝗蝻所傷。

又聞榛子鎮及豐潤等處地方。被蝗蝻災者。亦所在
間有。明歲錢糧。若仍照例催科。小民必致苦累。著俟
該撫查明分數到日。將康熙三十一年春夏二季應
徵錢糧。緩至秋冬徵收。○三十六年題准。直隸省被
災之霸州等三十九州縣。與未經成災之獻縣
等六州縣。三十五年民借米穀俱緩徵。○又題
准。江南省淮揚徐泗地方。去歲水災。三十五年
一應錢糧。已經蠲免。其三十四年未完錢糧。於
三十七年帶徵。○三十七年

諭。山西省康熙三十七年錢糧。已有諭旨通行蠲免。靜

樂等縣三十六年未完錢糧。若於三十七年徵收。則小民仍有催科之累。著於三十八年帶徵。○三十八年題准。江西省進賢武甯等州縣。田畝盡在山中。蓄積亦少。舊逋新欠。難以並徵。將三十五六兩年未完民欠銀。於三十九四十年帶徵。○四十二年覆准。奉天府承德等州縣歉收。將四十二年應徵米豆。並借給民人米穀。均於次年帶徵。○又

諭。山東今歲錢糧漕米。均應速行停徵。○四十三年題准。直隸省廣平等處。高下皆遭雨水淹沒。照荒

田墾種三年起科。至所有未完民欠及俸工銀。分作三年帶徵。○又題准。山東省泰安等州縣。麥禾被災。四十二年錢糧。已經停徵。其積年民欠。分作三年帶徵。○四十四年

諭。嗣後蠲免錢糧時。將節年未完舊欠錢糧停徵。○四十七年

諭。去年江蘇安徽浙江皆被旱災。今歲復報潦傷。所有舊欠帶徵銀米。仍暫停追比。○又覆准。江南省地方兩歲被災。將本年應徵一半漕米。於四十八年秋收帶徵。○四十八年題准。江淮揚徐鄆宿等

府州衛。本年夏麥秋禾皆傷。其現運漕糧漕項銀及舊欠漕項錢糧。均於四十九年秋收後帶徵搭運。○又覆准。江南省山陽等州縣衛。四十七年以前河灘地租舊欠。停徵一年。○四十九年

諭。兩浙竈地連被水淹。著將四十七八兩年未完鹽課。自四十九年起。分作三年帶徵。○五十四年覆准。直隸省地方雨水過多。將順天府之寶坻等州縣。河間府之任邱等十四州縣。及武清境內蘆漁課地。今歲未完錢糧。一併緩徵。○又覆准。甘肅

省五十三年被災地方。積年未完銀糧草。各照數分年帶徵。○五十六年覆准。安徽省所屬積年民欠。值災荒之後。令該撫將四十六年至五十四年各項舊欠。分年帶徵。○六十年覆准。浙江省仁和錢塘等縣被災。將五十四五五六三年錢糧。於六十一年帶徵。其五十七八九三年舊欠。挨次分三年帶徵。○又覆准。黃沁兩河水決。直隸省開州。長垣。東明。滑縣。田禾被淹。新舊錢糧。俟明年麥熟後徵收。○又覆准。沁河水決。山東省壽張。濮。范。聊城。博平等州縣被災。將六十

年未完錢糧。分作三年帶徵。○雍正元年覆准。山東省壽張。濮州等四州縣。衛黃水未退。所有六十一年帶徵六十年漕糧漕項。自雍正元年始。分作三年帶徵。○又

諭。山東山西河南三省。連年田禾歉收。將現年錢糧。盡行緩徵。而節年民欠帶徵之項。若仍行追比。緩新而徵舊。於兆姓終無裨益。將山東五十八年至六十一年分帶徵未完錢糧。山西五十六年至五十九年分帶徵未完錢糧。河南五十九年至六十一年分緩徵錢糧。作速行文。悉著停徵一年。○二年

諭雍正元年。因直隸山東山西河南二麥歉收。特遣廷臣發粟賑濟。錢糧除被災分數已經停徵。仍將兩年舊欠。分作三年帶徵。○又覆准。福建省臺灣遭匪類蹂躪。五十九年未完稻粟。分作三年帶徵。○又覆准。江南省蘇松鎮。淮揚五府屬。及太倉等十四州縣。本年田禾被風潮淹損。將漕糧徵一半。俟三年秋收後帶徵。又海州地方。今年被災更甚於去歲。本年災田漕米。全予緩徵。俟來歲秋收後徵完起運。○三年

諭。朕聞河南山東春雨稍缺。深切軫念。雍正元年七月

曾降諭旨。將河南康熙五十九年至六十一年分帶徵未完錢糧。山東康熙五十八年至六十一年分帶徵未完錢糧。均著停徵一年。雍正二年。復念二省去歲收成雖稔。百姓元氣方復。舊欠新徵。恐難兼顧。諭令該撫將實在民欠。分作三年帶徵。以紓民力。今二省春雨未足。著將河南康熙五十九年至六十一年帶徵錢糧。及雍正元年未完民欠。並從雍正二年起限。寬作五年帶徵。山東康熙五十八年至雍正元年帶徵錢糧。為數更多。著從雍正二年起限。寬作八年帶徵。又覆准。長蘆被水。食鹽壅積未消。將雍正三

年秋冬二季引課等銀。分作二年帶徵。○又獲
准。長蘆各場竈地被水。將雍正三年青滄二分
司被災十六場額徵課銀。於雍正四年帶徵。○
又獲准。山東省曹縣黃水衝決太行隄。田地被
淹。應徵新舊錢糧。緩至明歲麥熟後徵收。○四
年

論。去秋北方多雨。直隸所屬七十三州縣被水歉收。已
將被災地畝之錢糧。照例蠲免。共應徵額賦。又復停
徵。朕思一省之中。既有七十餘州縣收成歉薄。則鄰
封隔縣。必有謀生覓食之人。著將雍正四年通省應

徵額賦。一併停其徵收。○又

諭。去歲畿南被水。將雍正四年錢糧。通省均令緩徵。今年錢糧尚且緩徵。則從前未完之欠。豈有反急徵之理。速飭各地方官。凡一應舊欠錢糧。一概緩徵。○又諭。江蘇所屬之蘇松常鎮四府地廣人稠。需米甚多。四府所屬漕兌共一百四十餘萬石。居七省漕糧三分之一。今州縣既有被水之區。恐小民輸納匪易。著將成災五分以上之地。畝應出漕米。緩徵一半。其緩徵一半漕米。著於雍正五年秋收後帶徵。○十年覆准。浙江省嘉興府屬之石門。桐鄉。湖州府屬之歸

安烏程。本年雨雹。秋禾被傷。其應徵漕米等銀。緩至十一年秋成後。分作兩年帶徵。至南米係給兵餉之項。先借倉穀碾放。亦俟來秋帶徵。○十一年覆准。江南省南匯等縣。並金山鎮海等三十四州縣。十年秋海潮湧漫。風雨蟲傷。其本年應徵地丁錢糧。及十年以前各項舊欠。皆緩至十一年秋成後徵收。○又覆准。浙江省杭州府屬之海甯。嘉興府屬之海鹽石門桐鄉。湖州府屬之安吉烏程歸安長興德清武康嚴州府屬之遂安十一州縣。本年春間偶有冰雹。麥

豆被傷。應徵新舊錢糧。緩至秋成後徵收。○十

二年

諭。今年六月間。江蘇地方雨水積多。州縣低窪之地。被水淹浸。應徵新舊條糧。著緩至來年麥熟開徵。再應納南漕等米。亦准明秋折納。○乾隆元年

諭。陝甘民人自軍興以來。急公效力。甚屬可嘉。屢年叨蒙

皇考疊沛恩膏。朕又降旨。將本年應徵錢糧。甘省全行豁免。陝省止徵一半。以昭格外之恩。上年陝省收成未稱大稔。今年春夏之際。未免輸納艱難。著將應徵

一半額賦。寬至收成後開徵。○又

諭。甘肅平涼府所屬廳州縣。並鞏昌府屬西固廳。慶陽府屬環縣。及甯夏府屬靈州之花馬池石溝等堡。中衛之香山一帶。上年收成少歉。著將緩徵本色米糧。自元年為始。分作五年帶徵。○又覆准。湖北省漢川公安等州縣。並武昌左衛沔陽等衛。本年夏被水災。其蠲贖分數錢糧。此時急難催徵。至公安縣雖不成災。收成既歉。日用不敷。其本年應完之項。一併緩至來歲麥秋徵收。○又

諭。各省緩徵錢糧。例於下年帶徵以完國課。朕思年穀

荒歉有分數多寡不同。若本年被災尚輕。次年幸值豐收。則帶徵尚不致竭力。若本年被災較重。則民間元氣已虧。次年即遇豐收。小民既完本年應輸錢糧。又完從前帶徵之項。必致竭蹶。著勘明被災不及五分者。緩至次年徵收。其被災較重者。分作三年帶徵。被災稍輕者。分作二年帶徵。以紓民力。○三年奏准各省偶遇水旱。勘明被災不及五分緩徵者。仍照例分別緩至麥後及秋後徵收外。如本年被災八九十分者。該年緩徵錢糧。分作三年帶徵。其被災五六七分者。該年緩徵錢糧。分作二年

帶徵。○五年

諭天津地勢低窪。屢被水災。著將天津所屬帶徵之項。自本年為始。分作五年徵收。○又題准。福建省臺灣府屬鳳臺二縣。三年分秋被旱災。其田園官莊。應徵銀米。被災八九十分者。分作三年帶徵。五六七分者。分作二年帶徵。○六年

諭福建臺灣地方。上年秋間缺雨。收成歉薄。今春以來。米價日漸昂貴。小民謀食艱難。納課尤為竭蹶。多年舊欠。已概行豁免。至乾隆四年以後未完銀粟。統俟本年十月成熟之後徵收。○七年

諭甘肅地處西陲。民貧土瘠。頻歲軍興。連遭亢旱。除蠲免民欠並帶徵之項外。其乾隆元年以後借欠之項。著分作六年帶徵。○又題准浙江省仁和等州縣衛六年分被災田地。按分數除蠲免外。其應徵地丁銀米。分作二年三年帶徵。餘杭安吉二州縣又復被災。其應帶徵錢糧。緩至麥收後起徵。至竈蕩田地。除蠲免外。其應徵課銀。按照被災分數。亦分作二年三年帶徵。海甯被水沙地。除扣蠲免之數。餘賸租銀。緩至八月徵輸。○又

諭朕念甘肅地瘠民貧。前特降旨。民欠借糧一概蠲免。

今思從前有因糧缺。以銀一兩作糧一石。借為籽種口糧之需者。如蘭鞏平慶等屬。原借以銀作糧。即與借糧無異。此等抵借之銀。事同一例。自乾隆七年為始。分作六年帶徵。○又

諭上年山東歷城等十七縣衛秋禾被災。朕特降諭旨。將應徵新舊錢糧並漕米黑豆。一概緩至今歲及次年。兩年帶徵。於麥熟後起限。嗣因二麥不登。復緩至秋成後完納。但各州縣中有疊被災傷之歷城等十三縣。今歲雖獲有秋。而民力未甦。舊欠新徵。一時並納。未免拮据。著將歷城等縣並收併之衛地。其應徵

四五兩年舊欠。及帶徵六年之地丁。並出借之口糧
籽種。概緩至八年麥收後起徵。分年完納。○八年

諭。朕從前降旨。將江省清河等十二州縣衛。乾隆五年

以前未完帶徵銀。統行停緩。俟年歲屢豐。民間元氣
漸復之後。再行酌量定限。分年帶徵。茲又念山陽阜
甯鹽城甘泉高郵泰興興化寶應淮安大河揚州等
十一州縣衛。上年被災亦重。豐縣碭山贛榆三縣。災
雖稍輕。而均係連年被水之地。所有十四州縣衛。乾
隆五年以前未完地丁漕項銀米。著照清河等十二
州縣衛一體停緩。並將清河等十二州縣衛及山陽

等十四州縣衛。乾隆六年帶徵地丁漕項銀。同五年以前未完之項。一併停緩。俟年歲屢豐之後。酌量奏聞。又淮安分司所屬板浦等六鹽場。乾隆二三四等年帶徵未完折價銀。該督撫等因係鹽場名目。未曾歸入停緩之內。朕思竈戶輸納折價錢糧。與民人無異。著與民戶一例停緩。以示朕優恤民竈之至意。○

又

諭。甘肅蘭州府屬之皋蘭狄道靖遠金縣。平涼府屬之平涼涇州靈臺固原鹽茶廳鎮原靜甯華亭。慶陽府屬之安化甯夏府屬之中衛花馬池。甘州府屬之張

掖等處。舊欠地丁銀。自乾隆元年起至二三四五六七等年。積算其數。較之一歲正額。幾至加倍。若責令一時輸將。民力實為竭蹶。著將皋蘭等十五州縣。衛及鹽茶廳。節年舊欠地丁銀糧。分作四年帶徵。○又

諭。河南永城鹿邑夏邑三縣。乾隆四六七三年未完帶徵緩徵銀十有四萬餘兩。按各縣原欠數目。自乾隆九年為始。均作三年徵收。○又

諭。河南今夏雨澤不齊。其查勘成災者。已照例賑恤。聞開封府屬之陳留滎陽汜水。彰德府屬之湯陰。衛輝府屬之淇縣延津。並陝州等七州縣。雖不成災。然高

阜之地。收成究屬歉薄。著將此七州縣勘不成災之地。畝錢糧。緩至明年麥秋徵收。○九年

諭。甘肅安西道屬沙州衛。地處邊外。天寒土瘠。著將未完雍正十三年借給牛羴價銀。自乾隆九年起。分作三年帶徵。○又

諭。江蘇淮揚徐海四府州屬疊被水災。乾隆七年。四屬災戶共借籽種牛草銀二十五萬三千七百六十兩零。麥穀二萬一千四百一十二石零。為數已多。難以一併完納。著於本年麥收後開徵。分作三年。至十一年秋收全完。再乾隆八年江鎮淮揚海等屬歉收。安

東阜甯鹽城海州高郵興化寶應等州縣所借銀兩
穀石著准其分限兩年。自本年起至十年秋後全完。

○又

諭。山東齊東等十九州縣衛被旱歉收。已降旨將應徵
錢糧照例分別辦理。尚有勘不成災之地畝。例不在
寬免之列。朕念此等地方既屬薄收。今當青黃不接
之際。餬口維艱。著將濟南府屬之齊東陵縣德州平
原德平臨邑等州縣及德州衛。武定府屬之惠民海
豐樂陵商河濱州霑化陽信利津。東昌府屬之武城
恩縣夏津。沂州府屬之日照縣南鄉。並安東衛等十

九州縣衛應徵乾隆八年地丁及帶徵錢糧寬至本年秋成後再行徵輸。○又

諭。甘肅地方向來積欠繁多。朕曾降旨將張掖皋蘭等九州縣民欠。自乾隆八年始。分年帶徵。又將武威西甯二縣帶徵雍正十三年至乾隆三四年之項。一併蠲免。此外應徵舊欠。理應輸納。但念該省土瘠民貧。地處邊陲。著將張掖肅州高臺皋蘭河州狄道靖遠安化平涼涇靈臺靈州中衛。及武威西甯等州縣衛累年未完積欠銀糧草束等項。再行寬緩。自乾隆九年為始。分作六年帶徵。○又

諭。山東濟南府屬之歷城章邱德州。武定府屬之惠民陽信。泰安府屬之平陰肥城。沂州府屬之沂水蒙陰。青州府屬之博興高苑等。共三十六州縣。衛。勘不成災之地畝。例應徵輸。朕念各州縣麥收原屬歉薄。若因勘不成災。將新舊錢糧一時並徵。小民未免拮据。著將乾隆元年應徵地丁。寬至本年十月後起徵。其節年舊欠。緩至來年麥熟後徵收。○又

諭。山東濟武東青等府屬。有連被災傷之州縣。上年被旱。今歲夏麥又復失收之齊東陵縣德平德州臨邑平原惠民陽信海豐樂陵商河濱州利津霑化恩縣。

並現被災之博興樂安等十七州縣。及德州等衛。所有八九兩年借給口糧籽種等項銀穀。均緩至十年麥秋後徵完。又上年夏麥被旱。今年夏麥復被旱災之歷城章邱鄒平齊河濟陽長清青城蒲臺肥城平陰博平高苑等十二縣。所有八九兩年借給籽種口糧等項銀穀。亦緩至十年麥熟後徵收。其被旱雹未深。如禹城蘭山沂水蒙陰館陶高唐臨清等七州縣所借銀米等項。均於本年秋後徵收還項。○又

諭

山東青州府屬之博興樂安二縣夏麥被旱。秋收歉薄之處。所有本年錢糧。緩至來年麥熟後徵收。○十

年

諭山東武定府屬地土鹺薄。兼以連年被災。元氣未復。朕心廑念。著將惠民陽信海豐樂陵濱州商河利津霑化蒲臺青城等十州縣。乾隆九年未完錢糧。十年應徵新賦。概緩至本年秋成後徵收。其八九兩年出借口糧籽種。應於本年夏秋兩熟分別徵完者。亦著緩至秋後開徵。○又

諭山東濟南武定東昌青州四府屬內積歉之州縣衛所。除四五兩年未完無幾。仍照例徵收外。其六七八九十等年被災案內緩帶錢糧。自十一年起。分作五

年帶徵。每年徵完一年之欠。其節年出借口糧籽種。亦著分年分案徵收。○又議准。直隸省節年本年民借口糧籽種工本等項。數至萬石以上者。共二十處。鹽山。慶雲。二縣。為民欠最多之地。將所借米穀。分作三年帶徵。河間府屬之河間。故城。甯津。獻縣。景州。任邱。吳橋。天津府屬之滄州。南皮。靜海。保定府屬之雄縣。新城等州縣民欠。自萬餘石至二萬石以上。將新舊借項。均作二年帶徵。又交河。阜城。青縣。威縣。清河等縣。並深州。民欠萬石以上者。將本年借項徵還。其節年舊欠。

分作二年帶徵。又宣化府上年閭屬被災之後。本年亦多有冰雹成災之區。應將所欠均作二年帶徵。○又題准。江南省壽宿等州縣銜秋禾被水。應徵本年漕糧漕項。及蠲贖銀米。未完節年漕項銀米。均照例分年帶徵緩徵。○十一年

諭。直隸今年地丁錢糧。已全行蠲免。其慶雲鹽山二縣應徵憲課銀。例不在蠲免之內。但念二縣當積歉之後。民力未免拮据。著將慶雲鹽山二縣本年應徵憲課。暫緩徵納。俟秋收豐稔。該督奏明開徵。○十二年諭。東省被水被雹州縣。並前報被水之魚臺長清共二

十州縣衛。應徵新舊錢糧。俱著緩徵。俟查明後照例辦理。○又

諭。山東歷城等二十縣衛被雹。朕已諭令緩徵。今續報濟南府之德州陵縣德州衛。泰安府屬之泰安肥城東平東阿平陰等縣。武定府屬之青城利津霑化等縣。兗州府屬之滋陽曲阜甯陽鄒縣金鄉嘉祥汶上壽張等縣。並濟甯衛東平守禦所。曹州府屬之荷澤鉅野鄆城單縣武城沂州府屬之費縣。東昌府屬之博平清平高唐恩縣。青州府屬之博興高苑樂安等三十四州縣衛所。六月下旬。大雨時行。山水陡發。晚

穀未免傷損。所有應徵新舊錢糧。概緩徵收。○又

諭

安徽宿州虹等處秋禾被水。著將宿州靈璧虹縣

今並裁

宿州衛應徵漕項銀米。暫緩徵收。其未完積年漕項。亦著停緩。照例分年帶徵。○又題准。江蘇省濱臨江海地方。颶風驟雨。潮水衝決。常熟等十七州縣。並蘇州太倉鎮海金山。四衛民屯沙洲田禾花豆衝沒。又夏秋雨澤愆期。上元等十二縣。並楊州儀徵鎮江。三衛被旱災田地丁銀米。按分數蠲免。蠲贖銀米。按被災輕重。分年帶徵。十三年新賦。緩至秋成後啟徵。各年舊欠地丁銀米。緩

至來年麥熟後徵輸。如有勘不成災。收成歉薄。應徵本年地丁銀米。並借欠籽種。亦緩至來年麥熟後徵收。又災田漕糧漕項。所有被災較重之上海鎮洋寶山常熟昭文太倉通州各州縣。並蘇州太倉鎮海金山四衛災田。按分蠲免銀米。南匯嘉定上元江甯句容六合丹陽甘泉八縣。所有本年災田漕糧。均緩至明冬帶辦。漕項銀與地丁一例緩徵。○又

諭。山東省明歲係輸免錢糧之年。乾隆十二年未完地丁銀。應於奏銷前催徵。朕思本年齊河等州縣被災

田畝應完錢糧。已照例蠲緩。其勘不成災及不被災之處。與災地毗連者。收穫未能豐裕。著將應徵未完錢糧。於奉到諭旨之日。加恩停緩。展至十四年帶徵。

○又

諭山東被災各縣境內。有上年秋成少歉。尚未成災者。雖非被災民人可比。但與災地均屬毗連。輸將未免拮据。所有應徵舊欠錢糧。亦著加恩緩至麥熟後開徵。俾民力得以稍紓。○又緩徵山東省被災之德州。鄒縣等三十二州縣衛錢糧。○十三年

諭山東今歲應徵之因災出借倉穀七十六萬餘石。春

借穀四十六萬餘石。又本年帶徵之穀十數萬石。及麥本籽種漕倉項下應徵積欠錢糧。為數甚多。一時銀穀並徵。即屬大豐。以一年而完積年之欠。民力未免拮据。著加恩於今歲歲底截數。所有未完穀內。將春借一項。於明年麥熟後徵收一半。秋成徵收一半。留其餘力以輸該年正供。其屢年因災出借之常監等穀。概寬至十五年起。分作五年帶徵。俾民力紓徐完納。以示優恤窮黎之至意。○十六年

諭。江蘇之淮徐等屬。上年秋禾被水。已經加恩蠲賑。所有餘賸應徵漕米豆麥等項。緩至今冬帶徵。但念該

地上年被水稍重。即使今歲秋成豐稔。而災歎之餘。民氣正宜培養。若令新舊並輸。小民生計難免拮据。著將淮安府屬之清河桃源安東大河徐州府屬之邳州宿遷睢甯海州所屬之沭陽等八州縣一衛。本年應行帶完乾隆十五年災蠲餘贖漕項米麥豆。分作三年帶徵。以紓民力。○又

諭甘省各屬舊欠錢糧之外。尚有額徵芻草一項。不在蠲免之例。著將乾隆元年至十四年未完草一千五百萬餘束。分作十年帶徵。以紓民力。○又

諭東省今歲偶被偏災。應行賑恤事宜。已加恩分別辦

諭。陝省今年被旱偏災。屢經降旨。令該督撫加意撫恤。其勘不成災。及與災境毗連州縣。應徵銀糧。雖定例不准蠲緩。而該處收成。究屬歉薄。小民既謀食用。復效輸將。未免拮据。著加恩將韓城麟遊南鄭西鄉城固褒城沔縣洵陽平利三水中部樂川宜君甯羗興安隴州邠州沔陽鳳縣略陽石泉長武鎮安雒南等

二十四州縣。本年未完地丁銀四萬八千餘兩。本色糧一萬三千餘石。緩至來年麥熟後帶徵完納。其節年民欠常平社倉糧。及南鄭一縣未完乾隆十六年屯豆五百餘石。一併緩至麥熟後徵還。以紓民力。

又題准。長蘆所屬興國。富國。豐財。蘆臺。嚴鎮。海豐等六場。竈地。並滄州慶雲。二州縣歸併裁場。竈地。實在被水成災八九分不等。竈地共六百二十一頃五十四畝。竈丁一百八十九名。各有奇。內照例蠲免銀二百八十三兩一分有奇。尚應徵銀三百六十二兩一錢七分。分作三年帶

徵。又興國、富國、豐財、蘆臺、濟民、嚴鎮、海豐等七場。並滄州、南皮、鹽山、慶雲、青縣等五州縣。實在被水成災五六七分不等。竈地共二千七百八頃五十八畝。竈丁一千一百四十名。內照例蠲免銀三百六十八兩七錢三分有奇。尚應徵銀二千四百三十六兩八錢三分。分作二年帶徵。

○十八年

諭。山東武定府屬之利津、霑化、蒲臺、海豐。登州府屬之蓬萊、榮成、福山、棲霞等縣。曹州府屬之濮州、范縣。應徵節年欠穀。著統於本年秋後起限徵收。分作兩年。

完納。○又

諭山東掖縣濰縣昌邑被水各村莊。應追舊欠錢糧借穀。著緩至明年麥熟後徵收。○二十三年

諭去歲河南衛輝等屬被災。所有官借牛具籽種銀兩。著加恩緩作三年帶徵。○又

諭上年山東被水州縣內毗連災地。收成歉薄之處。應徵錢糧及帶徵未完銀兩。著加恩一體緩至麥收後開徵。○又

諭陝西米脂等八州縣民欠新舊常平倉糧。此次正屆徵收之期。但該處去秋收成歉薄。雖勘不成災。而間

間究屬拮据。所有應徵一半之常平倉糧。著加恩緩至本年秋成後徵收。○又

諭山西交城等四十州縣去秋歉收。所有借出社義二倉穀石。著分別緩徵。○又

諭山西太原保德等府州屬連歲災歉。民間已鮮蓋藏。官倉貯積亦屬有限。難借未免不敷。小民生計維艱。著加恩將新舊地丁錢糧。一概緩徵。至大同朔平等府屬。皆係地連邊境。承辦軍需。連歲秋收亦俱歉薄。著一體加恩。將新舊錢糧。緩至今年秋成後徵收。○

又

諭。濟甯魚臺二州縣已涸地畝。雖現獲豐收。而未涸之地及涸出未播種者。尚有二千六百餘頃。加恩將本年應徵錢糧。概行緩至明年麥熟後開徵。○又

諭。淮徐海三府州屬頻被水潦。著加恩將二十二年舊糧。先帶徵一半。所餘一半。同十一年至二十一年積欠銀米。及二十二年借給口糧籽種。均再分作兩年帶徵。再各屬本年水退稍遲未種地畝。所有應緩錢糧。亦著緩至明年開徵。○又

諭。福州等府屬秋來雨澤未能普遍。閒有歉收之處。著加恩將歉收田畝應徵錢糧。緩至明年麥熟後徵收。

其上年歉收緩徵未經徵收者。分作兩年帶徵。○又諭陝省延榆綏三府州屬。今歲偶被偏災。成災地畝。業經照例蠲緩。著加恩將未經成災神木等縣上年舊欠錢糧。緩至明年麥熟後徵收。其本年應徵錢糧。於明年秋後啟徵。至借欠倉糧。著一併分別新舊次第徵收。○又

諭延榆所屬八州縣。節年被災。糧價昂貴。所有歷年積欠社穀。並緩徵兵米。春借牛具折還穀石。俱著緩至明歲秋成起。分作五年帶徵。○二十四年。緩徵山西省太原等二十五州縣銀米倉穀。○又

諭。陝省今夏得雨稍遲。收成歉薄。雖於例並不成災。而

民力不無竭蹶。所有懷遠清澗米脂吳堡四縣本年應徵未完地丁錢糧草束。及帶徵舊欠。並常社倉糧籽種等項。俱著加恩緩至明年秋成後徵收。其咸陽醴泉同官韓城商州雒南六州縣民欠錢糧倉穀。緩至麥熟後徵收。至沿邊之膚施等七州縣帶徵錢糧倉穀。再緩一年。於明歲麥熟秋成後分別帶徵。○又

諭。直屬景州一帶地方。秋初間有得雨過多之處。收成

既已歉薄。生計未免拮据。著將應徵之糧。加恩並予停緩。又東鹿寶坻等濱河地畝。雖勘不成災。並著查

明一體停緩。○又覆准奉天府承德等州縣被災各戶。及無地窮丁應徵丁銀。均按成災分數。分年帶徵。○二十五年

諭。晉省連年歉收。屢經降旨。加恩緩徵。今歲幸遇豐收。正宜及時休養。俾安樂利。若令新舊銀米一時並徵。民力未免拮据。著再加恩。將領借常義社三倉穀石。分作三年帶徵。舊欠各項地丁銀米。亦著加恩暫緩徵收。於明歲秋成後酌量徵還。○二十六年。緩徵河南省被水之祥符等五十四州縣。本年出借及遞年民欠未完常平漕社各項穀石。○又

諭。安省宿州鳳陽等州縣衛節年未完各項銀糧。以去秋間被偏災。緩至本年麥熟後徵收。但念新舊一時並徵。民力仍未免拮据。著再加恩將宿州鳳陽等處未完地丁正雜銀兩。並漕倉銀米。以及民借籽種口糧。俱於麥收後先徵一半。其餘一半。緩至秋成後再行徵收。○又

諭。今歲山東濱河各屬。因雨水過多。秋禾間有被淹。著加恩將被災較重之曹縣城武二縣。應徵本年漕糧。及隨漕銀米。緩至二十七年。再分作三年帶徵。次重之金鄉等二十州縣。所有被災地畝。應徵漕糧漕項。

俱緩至二十七年再分作二年帶徵○又

諭今秋山東濱河州縣因隄岸漫溢田禾不無被淹所有成災地畝應徵額賦已照例分別蠲緩著加恩將德平等十一州縣勘不成災地畝及齊河等四十二州縣衛所內被災五分以下地畝應徵本年未完地丁銀兩及各年未完銀穀籽種等項一體加恩緩至明年麥秋後啟徵○二十七年

諭安徽上年被災各屬窪地陸續涸出處所現在雖即翻犁播種將來麥收尚難豫定著加恩將此等災地漕糧漕項概行停緩分作三年帶徵○二十八年

諭上年直隸偶被偏災。屢經降旨分別蠲緩。並令將緩徵帶徵之項。概緩至本年秋成後徵收。但小民當積歉之餘。元氣未復。若令新舊並徵。閭閻仍不免拮据。著再加恩。將應徵二十七年並節年緩徵帶徵未完銀糧。緩至來年麥熟後按數徵收。○又緩徵直隸省歷年借欠未完常社等倉米麥穀石。○二十九年。緩徵直隸省通州等十三州縣上年錢糧。○又緩徵山東省被水之濟甯等七州縣出借籽種。○三十一年。緩徵山東省歉收之歷城泰安等六十二州縣衛錢糧。及民借銀穀。○三十二

年

諭江西南昌新建等縣。本年秋田偶被偏災。念此數縣連年被水。民力倍為拮据。所有本年應完漕糧。著分作三年帶徵。○又緩徵山東省歉收之海豐等十二州縣舊欠錢糧。及各年民借未完倉穀麥本等銀。○三十三年。緩徵山東省歉收之樂陵。商河。德平。三縣節年舊欠銀穀。○又緩徵河南省歉收之蘭陽等十一縣民借常社等倉穀石。○三十四年

諭湖北省安陸等州縣。上年得雨稍遲。收成不無歉薄。

已分別加恩蠲緩。照例賑恤。即勘不成災之州縣衛所田地。亦經將應徵錢糧。緩至麥收後啟徵。今念該省尚有京山隨州二處。雖俱勘不成災。而高阜之區。秋收顆粒不及往年。民食仍多拮据。著再加恩將應徵屯餉錢糧。一體緩至麥熟後徵收。○又緩徵湖南省被水之華容安鄉二縣秋後錢糧。○三十五年。緩徵河南省歉收之安陽等十九縣上年未完錢糧。並安陽湯陰汲縣新縣獲嘉淇縣等六縣三十三年舊欠。○又緩徵陝西省被水之興安州本年地糧。○又緩徵河南省被水之河內

武陟二縣舊欠銀穀。並籽種口糧。○又緩徵江蘇省歉收之江浦等五州縣舊欠銀米。○又緩徵山東省被水之章邱齊河等三十州縣衛錢糧。及舊欠銀穀。○三十六年。緩徵山東省被水之長清。歷城等六十四州縣衛錢糧。及舊欠正賦穀石。○又

諭甘省各該州縣。民間借欠未完銀一百三十二萬餘兩。無論被災輕重。著分作六年帶徵完納。○三十七年

諭直隸省上年濱河州縣間被偏災。其中毗連地畝勘

不成災者。格於成例。不得同霑愷澤。朕思災歎州縣。既在五分以上。其不成災村莊。雖屬有收。而左右前後閭閻。緩急相通。事所必有。若照例徵輸。情形未免拮据。現在開徵屆期。著再加恩。將宛平等二十四州縣。勘不成災各戶。應納錢糧。亦予緩至本年秋成後徵收。○又緩徵直隸省上年被水之宛平等二十四州縣。蠲贖銀兩穀豆。○三十八年

諭。盛京各城旗人積欠餘地租銀六萬餘兩。一時並徵。恐不免稍形拮据。著加恩分作六年帶徵。○又緩徵河南省被風之正陽確山二縣銀穀。○三十九

年

諭山東臨清州城鄉經賊被害之處所有本年應完正賦並帶徵蠲贖錢糧著概行緩至明歲秋成後啟徵應徵漕糧俱緩至明年秋後起分作兩年帶徵○四十年

諭甘肅僻近西陲民貧土瘠一遇水旱偏災即降旨蠲賑緩帶第念該省每年均有應徵地丁籽種等項銀兩自應再加區別展帶用昭體恤所有河州等處歷年未完銀兩仍依原限帶徵外其甯遠等處再展限二年皋蘭等處再展限四年俾得從容完納○又

諭上年順天河間天津等屬偶被偏災著加恩無論成災及毗連災地應徵上年錢糧概緩至本年秋成後徵收。四十一年。緩徵甘肅省上年被災之皋蘭等三十七州縣未完籽種。四十二年。緩徵湖北省被水之江陵監利二縣錢糧。四十三年。緩徵河南省歉收之開封彰德衛輝懷慶河南五府屬錢糧。又緩徵直隸省上年被旱之廣平大名二府屬新舊錢糧。又緩徵河南省上年歉收之開封等五府屬錢糧倉穀。又

諭豫省開封彰德衛輝懷慶河南陳州六府並許汝二

州。本年雨澤稀少。春麥未得及時播種。業經加恩酌借口糧耕種。並上年出借倉穀。緩至來年麥收後徵還。以紓民力。第念該省久旱之後。復被水災。若將籽種口糧。與出借倉穀同時並徵。民力未免拮据。著再加恩。將秋收尚有八分之涇川等三十一州縣所有出借倉穀。減半徵還。餘俟來年秋收後徵收還項。其秋收僅有七分之通許等十八州縣。同秋收僅有六分之許州。並襄城長葛二縣。及毗連災地淮甯太康二縣。出借倉穀。均緩俟來年秋後徵還。至上年先已被災。秋收僅有七分之汲縣臨漳二縣。本年出借籽

種口糧倉穀。均俟來年麥熟後分別徵還。再汝陽等十八州縣出借倉穀。先徵十分之六。餘俟明年秋後徵完。○又緩徵山東省歉收之歷城范縣夏津等二十一州縣新舊錢糧。○又緩徵直隸省上年歉收之順德廣平大名三府屬舊欠錢糧。○四十四年。緩徵直隸省上年歉收之大名廣平順德三府屬出借口糧社義倉穀石。並常平糶價銀兩。○四十五年。緩徵山東省被災之曹縣定陶武城三縣出借倉穀。○又緩徵河南省上年被水之儀封考城等州縣蠲贖錢糧。○四十六年。

緩徵江西省歉收之南昌等縣錢糧。及軍屯餘
租。○又緩徵山東省被水之章邱鄒縣等十七
州縣衛糧銀。○四十七年。緩徵陝西省被災之
膚施等十九州縣銀糧草束。並新舊借欠常平
社倉穀石。○又

諭。明興來京陛見。詢以該省辦災事宜。據稱濟南曹州
等府所屬州縣中未經被水各鄉。收成原屬豐稔。是
以仍照例徵收地丁銀糧等語。各省辦理災賑事務。
例應確查實在被水鄉莊。給予賑恤。毋致冒濫。但一
州一邑之中。其未經被水鄉莊。究與災地不遠。亦應

加意休養。使得分其有餘以濟不足。著將山東被水各州縣中成災在五分以上者。其成熟之各鄉村。概緩至明歲秋季徵收。以紓民力。嗣後各省遇有災賑事務。將成災五分以上州縣之成熟鄉莊。俱著照例一體緩徵。著為令。○四十八年。緩徵山東省連年被災之兗曹濟三屬新舊錢糧。及漕米倉穀。○又緩徵陝西省被霜之定邊等六縣新舊銀糧草束。及借欠常社倉糧。○四十九年。緩徵山東省被水之兗州等屬新糧漕米倉穀。○又緩徵福建省被水之建安甌甯南平三縣錢糧。○又緩

徵江西省被水之南昌等六縣糧銀。○又緩徵河南省被旱之汲縣等十六縣民欠未完銀兩。○五十年。緩徵河南省缺雨之開封等屬未完錢糧。及一切帶徵等項。○又緩徵直隸省缺少雨雪之廣平。順德。大名。三府屬。暨景州等州縣錢糧。並上年未完額賦及帶徵倉穀。○又緩徵江蘇省缺雨之淮。徐。海。三屬新舊錢糧。○又緩徵安徽省缺雨之亳州等十一州縣新舊錢糧。○又緩徵山東省缺雨之兗州。曹州。濟甯。三府州屬。暨德州等州縣額賦。並舊欠錢糧倉穀。

○又緩徵山東省歉收之長清金鄉魚臺嘉祥四縣及坐落衛地錢糧籽種並上年漕糧倉穀○又緩徵河南省被旱之衛輝等州縣未完額賦及歷年錢糧倉穀○五十一年。緩徵浙江省上年缺雨之杭嘉湖三府屬仁和等十七州縣並杭嚴嘉湖二衛地丁漕項銀米○又緩徵山西省上年被水之忻代定襄等六州縣額賦倉穀並文水縣之西莊汾陽縣之瀙城等村莊舊欠錢糧○又緩徵山東省上年歉收之歷城等九州縣及坐落衛地新舊錢糧○又緩徵山東

歷年歉收之嶧縣等州縣衛舊欠常社米麥漕糧。又緩徵河南省歉收之祥符等州縣舊欠地丁正耗漕糧。五十二年緩徵安徽省上年被災之懷甯等十六州縣舊欠錢糧。又

諭。濟南兗州各府屬上年雨雪短少。麥田未能普種。所

有厯城等五十三州縣及坐落衛所五十一年分應徵地糧米穀籽種。及前次未經分年帶徵之項。俱著緩至本年秋收後分作二年帶徵。內有五十年秋禾成災及勘不成災之州縣衛所。應帶徵節年地糧米穀籽種。前次定限二年之項。著分作三年帶徵。定限

三年之項。分作四年帶徵。統於本年秋後開徵。○又
緩徵直隸省缺雨之慶雲鹽山二縣新舊錢糧
倉穀。○又緩徵山東省上年歉收之濟陽等十
七州縣及坐落衛地積欠錢糧籽種。○又

諭安省亳州等處疊被災祲。所有成災及勘不成災之
州縣。節年緩徵帶徵正雜錢糧。及漕項漕米。著分別
年限遞行展緩。壽州等州縣應徵五十年帶徵緩徵
各項銀米。著隨同本年新糧徵收。其五十一年帶徵
緩徵銀米。著緩至五十三年秋後開徵。○五十三年。
緩徵直隸省上年被旱之宣化府屬各州縣新

舊錢糧倉穀。○又緩徵山西省上年歉收之豐鎮等九廳州縣暨左雲右玉二縣錢糧。○又緩徵直隸省缺雨之順德等三府屬舊欠地丁及借出各項未完銀兩。○又緩徵山東省缺雨之歷城等五十四州縣新舊錢糧。○又緩徵直隸省缺雨之順德等三府屬上忙錢糧。○又緩徵河南省缺雨之彰德懷慶衛輝三府新舊錢糧。

○又

諭順天等府屬春夏以來雨澤短缺二麥難望有收大田亦多未種。所有大城等四十九州縣並延慶龍門

赤城三州縣應徵節年新舊錢糧倉穀旗租及萬全等州縣上年因災賞借之口糧俱著加恩一體緩至秋成後徵收如並無節欠糧租者准其將本年新糧一體緩徵○又緩徵江西省被水之南昌等八縣漕糧○又緩徵山西省上年被旱之大同朔平二府屬十一廳州縣新舊錢糧並籽種銀穀豆石○又緩徵直隸省被雹之蔚州西甯懷安三州縣新舊錢糧倉穀○又

諭湖北荊州各府屬州縣成災六七分者應行緩徵之外再酌為遞緩寬限一季帶徵○又緩徵浙江省被

水之遂安縣地丁漕項錢糧銀米。○又

諭。湖北成災較重之江陵等十州縣。本年應徵漕糧正耗米石水腳隨漕銀兩。均緩作兩年帶徵。成災較輕之松滋江夏二縣。本年應徵漕糧正耗米石水腳隨漕銀兩。緩作一年帶徵。統俟下年帶徵五十年災緩銀米全完之後。再行遞年帶徵。其各衛所屯田分坐災地應徵各項銀兩。著一併緩至下年帶徵。○又

諭。湖南武陵龍陽澧州三州縣被水較輕。著加恩將下半年錢糧照例一併緩徵。其華容岳州衛武陵龍陽四屬帶徵緩徵錢糧。及借給籽種口糧未完銀穀。又

武陵縣緩徵未完錢糧。俱緩至次年秋後徵收。○又
緩徵湖南省被水之華容安鄉二縣下忙錢糧。

○又

諭。本年衛輝懷慶二府屬地方。因雨澤缺少。收成歉薄。
著將淇縣等縣帶徵舊欠漕糧。遞展一年。所有緩徵
舊欠錢糧。並民欠倉穀籽種等項。均緩至五十四年
麥熟後徵收。至汲縣等縣本年地丁並緩徵帶徵舊
欠錢糧倉穀等項。均緩至五十四年麥熟後徵收。其
本年漕糧。著自五十四年起。分作兩年帶徵。舊欠漕
糧。亦著加恩遞展一年徵解。○又緩徵江蘇省被水

之蕭縣等州縣新舊糧米。並山陽等縣舊欠錢糧。○五十四年

諭。直隸清苑等縣未完五十一二兩年緩徵地糧旗租。俱緩至秋後開徵。○又

諭。河南衛輝府屬上年被旱稍重之汲縣等四縣本年地丁錢糧。著緩至明年麥熟後開徵。其被旱較輕之淇縣等六縣。並懷慶府屬之原武修武陽武三縣。著緩至本年秋成後開徵。其歸德府屬之商邱等州縣本年應徵新糧。著分作兩年帶徵。○又緩徵福建省歉收之漳泉二府屬舊欠錢糧。○又緩徵河南

省被水之安陽臨漳二縣米麥豆石。○又緩徵湖南省上年被水之武陵華容安鄉三縣前借麥本銀兩。○又

諭江南廟灣場成災五分之十二莊。其未完舊欠錢糧籽種著遞緩徵收。至勘不成災之七莊及海州三場本年應徵錢糧並歷年因災帶徵錢糧及舊欠借給口糧亦著展至來年麥熟後分作二年帶徵。○又

諭安徽各屬連年俱被偏災。所有本年秋收成熟之懷甯等州縣積欠地丁隨漕籽種等項著加恩分限四年帶徵。○五十五年緩徵甘肅省歉收之皋蘭等縣

正雜銀糧草束。○又緩徵山東省被災之平原等州縣漕糧。○又緩徵山東省被水之鉅野等十五州縣漕糧。○五十六年

諭。安徽和州安慶衛積欠南屯蘆課等項銀兩。因連年疊被水淹。民間元氣未能驟復。若新舊一時並徵。恐民力實有不逮。著再加恩。將未完災緩帶徵南屯米折蘆課銀兩。俱以五十五年起。分限二年帶徵。○又緩徵直隸省歉收之邢臺等八縣錢糧。○又緩徵河南省歉收之各屬新舊糧穀。○又

諭。山東被水之濰縣南臺社等處。本年錢糧倉穀。及歷

年舊欠均著加恩一體緩徵。又被旱之臨清州新莊等村莊。歷年帶徵新舊錢糧。均著暫行停緩。俟明年麥收後完納。其應輸漕米亦著加恩緩徵一年。○又緩徵直隸省歉收之廣宗等十一州縣錢糧。○

又

諭鳳潁等府屬各州縣。本年窪地過水。收成歉薄。應行帶徵舊欠錢糧。為數尚多。所有鳳陽等六州縣低窪地畝。應完五十四五兩年丁地屯折漕糧漕項等款。舊欠銀米。並天長縣自四十八年起至五十五年止。舊欠銀米。俱著加恩緩至來年秋後徵收。又壽州自

五十年起至五十三年止。定遠鳳臺二縣鳳陽長淮二衛自四十八年起至五十三年止。應徵歷欠銀米。所有低窪地畝。均照原限展緩至五十七年開徵。其餘應完分限帶徵銀米。以次遞緩。至來年秋後徵收。以紓民力。○又

諭江南蘇州等府屬雨水較多。低窪地畝。間被淹浸。所有長洲等十一縣本年應完漕屯等米。著加恩緩至來年秋收後。分作二年帶徵。其應納地丁等銀。亦著緩至來年麥收後完納。又太倉州屬之寶山縣並海州暨所屬之沭陽等三州縣本年墊漕銀兩。及麥石

地漕等款。一併緩至來春麥收後。分作兩年徵收。○
五十七年。緩徵河南省缺雨之安陽等三十一
州縣新舊糧穀。○又緩徵直隸省缺雨之邢臺
元城等三十二州縣新舊倉穀錢糧。○又緩徵
陝西省缺雨之咸甯等十六廳州縣錢糧。○又
緩徵山東省缺雨之德州等二十四州縣衛新
舊錢糧倉穀。○又緩徵江西省被水之南昌等
縣糧銀。○又

諭。安徽壽州鳳陽等州縣衛。原係積欠之區。本年窪地
又經過水。其桐城潛山二縣並安慶衛沿江地畝。因

五月間雨多江漲。水衝沙壓。雖據該撫勘不成災。收成究屬歉薄。所有桐城縣並安慶衛自四十八年起至五十六年止。潛山縣自五十年起至五十六年止。低窪村莊積年舊欠地丁蘆課及隨徵耗羨等款。俱著緩至來年秋成後徵收。其鳳陽靈璧宿州三州縣低窪村莊應徵五十四五十六三年地丁屯折各項。及隨徵耗羨等款。又壽州自五十年起至五十三年止。定遠鳳臺二縣並鳳陽長淮二衛自四十八年起至五十三年止。低窪村莊分限應徵舊欠錢糧。並著分別展緩至五十八年秋成後啟徵。○又緩徵山東省

歉收之歷城長清等二十九州縣漕米。○又緩徵陝西省被災之藍田大荔澄城郃陽白水等五縣錢糧。○五十八年

諭豫省河北各屬上年被旱成災收成歉薄安陽等二十五縣所有歷年借欠籽種口糧及借欠常社等穀均著緩至五十九年麥熟後開徵其湯陰臨漳等十三州縣本年徵收新漕之時著帶完五十六年緩徵漕糧其五十七年一半漕糧統歸五十九年一併帶徵全完。○又緩徵山東省上年被旱之德州堂邑等四十五州縣衛舊欠錢糧倉穀籽種口糧麥本

河銀等項。並低窪地畝未完銀穀民佃竈課銀米。○又緩徵浙江省被水之烏程等五縣漕米錢糧。○五十九年。緩徵直隸省歉收之清苑等一百七州縣新舊倉穀錢糧。○又緩徵山東省缺雨之歷城等五十一州縣衛新舊銀糧。○又緩徵河南省歉收之安陽等二十一州縣新舊錢糧。並節年借欠種糧等項銀穀。○又緩徵陝西省歉收之蒲城等五縣新舊錢糧。○又緩徵江蘇省被水之泰州。海州。各鹽場新舊折價錢糧。○又緩徵山東省歉收之臨清武城。館陶。夏

津寇縣邱縣德州恩縣並臨清德州二衛銀穀
漕米。○又緩徵安徽省歙收之懷甯等十九州
縣並安慶鳳陽長淮泗州等四衛地丁南屯米
麥豆折蘆課津貼屯折暨新舊漕項銀米。○又
緩徵江蘇省被水之松江華亭等縣地丁漕糧。
○六十年。緩徵湖南省貴州二省被擾之永綏松
桃等廳縣上忙錢糧。○又緩徵貴州省被擾之
銅仁等府廳屬錢糧。○又緩徵湖南省被擾之
沅陵等縣上忙錢糧。○又緩徵直隸省上年被
水之各屬上忙錢糧。○又緩徵四川省被擾之

秀山等縣上忙錢糧。○又緩徵陝西省缺雨之咸甯等三十三廳州縣錢糧。並民借常社倉穀。○又緩徵山西省歉收之永濟等六縣錢糧。及民借倉穀。○又緩徵甘肅省被旱之平涼等九州縣。並歉收之皋蘭等縣銀糧草束。○又緩徵湖南省被擾之鳳凰。永綏。乾州三廳及附近瀘溪。沅陵等縣下忙錢糧。○又緩徵福建省被水之漳浦等縣錢糧。○又緩徵江蘇省歉收之海州等州縣衛新賦。並舊欠錢糧籽種銀。○又緩徵江蘇省被水之板浦等場壓徵折價錢糧。○

又緩徵湖北省被水之荊門等州縣錢糧。○又
緩徵福建省被災之漳浦長泰等縣錢糧。○又
緩徵廣東省缺雨之潮州府屬民欠糧米。○又
緩徵四川省被擾之秀山縣錢糧。